

COMUNICATO n. 542 del 04/03/2026

'Z mangda nemmen toal di djungen boda hām zbisnen in 18 un in 29 djar zo arbata vor di khempf boda paitn in alpinar raum

Rat von djungen vo EUSALP, offe di kandidaturn sin atz 12 von madjo

[Cimbro] Stercharn hërta mearar da alpinar redjong, mearar gepuntet un guat auzohaltase: azma bill gelāngen aftz dise ziln di Lentar mochan arbatn pittnāndar drinn in di stratedjì vodar European Uniong vor da Alpinar Redjong (EUSALP) zo vüara in alpinar raum in daz zuarkhemmane. Haür o, di djungen djeneratziongen mang helvan zo riva aftz ditza zil, nemmante toal in Rat vo EUSALP, boda iz gemacht vo 28 toalnemmar (viare vor aniaglaz alpinar Lânt) boda austian vor a djar, ma boda dena mang khemmen vorlengart vor an āndarz djar.

Di djungen boda hām von 18 afte 29 djar un boda lem in ummana von 48 redjongen toal vo EUSALP in Beleschlānt, Taütschlānt, Österraich, Slovenja, Svaitz, odar Liechtenstein mang inngem soi kandidaturn sin atz 12 von madjo 2026.

A plattform übar di grentzan boda gitt vèrt in djungen

Dar Rat von djungen gitt a Plattform boda zuargitt alln in djungen zo maga nemmen toal in sèll boda khint auzgemacht von organe vo EUSALP un sichart azta alle di idee un daz sèll bosa pensārn khemm gehaltet guat. Di toalnemmar lengse untar vürzovüra politike un prodjèkte vor di Alpm vürlegante konkrètege prodjèkte un initziativan, machante khennen soine idee in politike von State un von redjongen vo EUSALP un schupfanse zo halta kunt von soine spetzifegen rècht a livèll européo. Di djungen lirn zo nemma toal in demokratege protzèss, konfrontarantese pitt āndre zungen un kulturn. EUSALP sèlbart, lirnt von djungen un nimp au hërta naügarne idee von sèlln boda inan tage bartn lem in alpinar raum.

Dar Rat vinntze viar odar vünf vert aniaglan mandätt durch virtuāl struméntn in tematege khnöpf vürzovüara konkrètege arbatn. Di djungen boda au soin, lengse untar vor a mobilitét boma mage auhalten, lengse pittnāndar pitt āndre initziativan hërta auglekk vo djunge, arbatn aftaz sèll bomen mage impaitn von alpinar redjongen un machan khennen in naturāl un kulturāl schatz von Alpm.

Kandidaturn sin atz 12 von madjo 2026

Di kandidaturn gian inngètt durch in [portāl EUSALP](#). Dar Rat bill machan übarleng aftz bia dar alpinar raum iz nèt hërta gelaich vor alle, vor daz sèll bartma süachan zo zornira pitt sinn di toalnemmar zbisnen in simm Lentar vo EUSALP, zo sichra azta alle di redjongen hām soin vortretar un asó bartma o süachan aztada sai saiz puam azpe diarnen.

Di State un di redjongen vo EUSALP, bartn auhalten bazta khint gezert von toalnemmar vor di viazan zo nemma toal in trèff un bartn gem soi hilfe vor allz daz sèll boda bart soin mångl. Zo bizzasan mearar: <https://alpine-region.eu/alpine-youth>.

EUSALP (EU Strategy for the Alpine Region) iz a stratedjì makroredjonāl augelekk 'z djar 2015 von européan Rat zo sterchra di mittarbat übar di grentzan un interredjonāl in alpinar raum, zo rispundra in khempf boda paitn alle genoatn.

Vo EUSALP soinda toal simm State: vünf toalnemmar vodar EU (Beleschlānt, Taütschlānt, Österraich un Slovenja,) un zboa auz vodar EU (Svaitz, un Liechtenstein) in gāntzan 48 redjongen darzuar in zboa Provintzan vo Tria un Poatzan.

Di stratedjì iz da sèll zo nütza di naturàln un kulturàln schèt看 in modo azza mang soìn augehaltet un darzuar zo pinta di lentar vo pèrge, zo maganen zuargian destrat aulegante aktziogen bodase vüarn vürsnen un bodase machan krescham

Ändre informatzionen atz <https://alpine-region.eu/>.

Gekhluppet: dar plakàtt

Übarsetzt von Schaltarle vor di zung von Toalkamou vodar Zimbar Hoachebene

(cdt)